


ما رنینگ گو جری نیو ز بلیٹن مو رخہ 06 اکتوبر 2023




یوہ آکا شوانی جموں بے محمد اکرم چودھری تیں خبر سُنو۔



LG

لیفٹنٹ گو رنر منوج سنہا نے کہیو ہے جے جموں کشمیر ملک غے اندر اج ہر اک شعبہ مانہہ معاشی طور ترقی غے نال کامیابی غی اک نویں کہانی ہے جس نال لوکاں غی زندگیاں مانہہ بہتری آرہی ہے اور جموں کشمیر مضبوطی آئے پاسے بد رہیو ہے۔ وے سرحدی ضلع کپواڑہ مانہہ اک عوامی پروگرام نال خطاب کر رہیا تھا۔ 26 عشاریہ 84 کروڑ مالیت آلا منصوبیاں گا افتتاح دوران لیفٹنٹ گو رنر نے کہیو جے کپواڑہ تے دوجا اضلعا دبائیاں توں نظر انداز رہن توں بعد ہون ترقی گا عام دائرہ مانہہ جوڑیا ہیں تے ہون یہ ضلع وی معاشی تے ہر لحاظ نال ترقی دیکھ رہیا ہیں۔ لیفٹنٹ گو رنر نے 28 انفنٹری ڈویزن غا صدر مقام ور وجر جنگی یادگار اور شہید بہادر فوجی جواناں نانہہ خراج عقیدت پیش کی۔ تے اس موقع ور انہاں نے کہیو جے ملک غی سالمیت تے یکجہتی غی حفاظت کرتاں واں شہادت پان آلا فوجی جواناں غی قربانیاں نانہہ ہمیشاں یاد رکھیو جائے گو۔ اور اس گو کوئی ثانی نہیں ہے۔



DGP


جموں کشمیر پولیس غا ڈائریکٹر جنرل دلباغ سنگھ نے کہیو ہے جے جموں کشمیر پولیس دوجا سلامتی دستاں نال مل غے جموں کشمیر وچوں بچیا وا دہشت گرداں گا خاتمہ واسطے واعدہ غی پابند ہے۔ انہاں نے مزید کہیو جے جموں کشمیر پولیس جموں کشمیر غا شہریاں نانہہ بہترین تے محفوظ ماحول دین واسطے وعدہ بند ہے۔ گذشتہ روز اننت ناگ مانہہ فوج، سی اے پی ایف تے پولیس غی اک سانجھی میٹنگ نال گل بات کرتاں واں انہاں نے کہیو جے جموں کشمیر پولیس غی کوششاں نال یوٹی غے اندر امن نانہہ مضبوطی ملی ہے۔ ڈائریکٹر جنرل دلباغ سنگھ نے جموں کشمیر غا لوکاں نانہہ خبردار کرتاں کہیو جے وے پاکستان غی طرفوں ناپاک سازش تیں بچیں۔ کیونجے پاکستان جموں کشمیر غا امن نانہہ خراب کرن واسطے لگاتار ہر طرح غی کوشش کر رہیو ہے۔ انہاں نے ہدائیت کی جے منشیات غے خلاف لڑائی نانہہ اگلی سطح ور لے جایو جا ئے۔ کیونجے گو انڈی ملک منشیات غو استعمال کر غے دہشت گرد سرگرمیاں واسطے رقومات جمع کر رہیو ہے۔ تے نال ہی نوجوان نسل نانہہ وی نقصان پجا رہیو ہے۔ اس دوران اندرونی معاملات با رے وزارت نے جموں کشمیر ٹیمو کریٹک فریڈم پارٹی نانہہ غیر قانونی ایسو سی ایشن قرار دیناں واں 5 سالوں واسطے اس ور پابندی عائد کر دتی ہے۔ گذشتہ تہاڑے جاری اک

نو ٹیفیکیشن مانہ اندرونی معاملن با رے وزارت نے جے کے ڈی ایف پی نانہہ مُلک مخالف سرگرمیاں مانہہ ملوث پایا جان غے پیش نظر پابندی عائد کی ہیں۔



CS

چیف سیکریٹری داکٹر ارون کمار مہتہ نے کہیو ہے کہ سرکاراں نے خُفیہ دروازاں توں 20 عشاریہ 50 لکھ روز گار غیر مستحق لوکان نانہہ مرکزی زیر انتظام جموں کشمیر غے اندر دتا ہیں۔ شمالی کشمیر غا کپواڑہ ضلع مانہہ اک پروگرام مانہہ گل کرتاں واں اُنہاں نے کہیو جے لیفٹننٹ گورنر غی قیادت مانہہ موجودہ حکومت غیر قانونی تے خُفیہ دروازاں توں ہون آلی تعیناتی ور روک لان خاطر پابند ہے۔ اُنہاں نے مزید کہیو جے جہیڑا سرکاری روز گار حاصل کرن غا اصل حقدار وین گا۔ اُہاں نانہہ اُن غو حق ملے گو۔ اور جہیڑو حق نہیں رکھتاں اُن نانہہ دوجا طریقہ غا روز گار اپنانا وین گا۔ چیف سیکریٹری نے کہیو جے گذشتہ 3 سالان مانہہ جموں کشمیر غے اندر 30 ہزار روزگار فراہم کیا گیا ہیں۔




ADC Jammu

ضلع انتظامیہ جموں نے نوراتراں، رام نوامی غے دوران یا تریاں نانہہ سہولیات پجان خاطر ہر طرح غا بندوبست کر لیا ہیں۔ واضح رہے جے آئندہ تہوراں غے مد نظر ایڈیشنل ڈپٹی کمشنر ہر ویندر سنگھ نے نوراترہ تہوار دوران باہو فورٹ میلہ سمیت شہر مانہہ رام نوامی تے دو شہرہ تقریبات واسطے تیاریاں غو جائز و لیو۔ اُنہاں نے جموں میونسپل کارپوریشن، عوامی کم کاج تے جل شکتی محکمہ نانہہ جاری کرتاں واں کہیو جے شہر غا مشہور مندران نانہہ جان آلی سڑکاں ور لک پان گو کم تے پین غا پانی سمیت صاف صفائی نانہہ یقینی بناویں۔ اُنہاں نے 24 گھنٹا ڈیوٹی واسطے نو ڈل افسر غی تعیناتی غو حکم دتو۔ اُنہاں نے بجلی محکمہ نانہہ کہیو جے وے شہر غا مشہور مندران نانہہ بنا خلل بجلی فراہم کیا جان نانہہ یقینی بناویں، باہو قلعہ میلہ مانہہ تے جھانکی رستاں ور مناسب ادویات غی سہولیت وی دستیاب رکھی جائے گی۔ اس دوران ٹرانسپورٹ محکمہ نانہہ کہیو ہے جے وے باہو قلعہ واسطے آمد و رفت خدمات نانہہ بدھا وین۔



Freak Rajouri

گذشتہ روز ضلع راجوری مانہہ فوج غا اک کیمپ غے اندر غیر معمولی شے غا پھٹن نال لگ بھگ 5 فوجی جوان زخمی ہو گیا جن مانہہ 3 افسر وی شامل ہیں۔ فوج غا وائٹ نائٹ کور نے اک پیغام جہیڑو سماجی میڈیا ور سانجھو کیو ہے جے اک گرینیڈ غا حادثاتی طور پھٹن نال فوج غا جوان تے افسر زخمی ہوا ہیں۔ جن غی حالت شروعاتی علاج توں بعد ٹھیک دسی جا رہی ہے۔ اس بارے باقی تحقیقات اجوں چل رہی ہے۔



## Phulwari Ramban

محکمہ سماجی فلاح و بہبود دہلی طرفوں و تسلیہ غے تحت چلائی جا رہی مہم مانہہ پُھلواڑی مرکز رام بن نے 5 دنوں غی اک پہلی بچی نانہہ گذشتہ روز حاصل کیو ہے۔ ڈپٹی کمشنر رام بن مسرت اسلام نے ضلع سماجی فلاح و بہبود افسر رام بن راہل گپتا غے نال پُھلواڑی مرکز رام بن مانہہ دورو لا غے اُت سہولیات غو جائزو لیو۔



اس غے نال ہی گوجری خبراں غو یوہ بُلیٹن ختم ہوؤ۔

